

## **Transkrip husi La'o Hamutuk/TVE nia entrevista ho António da Conceição 'Kalohan', 7 Marsu 2017**

Transkrip ida ne'e halo husi La'o Hamutuk no bazeia ba entrevista orijinal ne'ebé loke iha TVE.

Juvinal: Benvindu mai programa D Challenge. Programa ida ne'e realiza ho kolaborasaun hamutuk entre La'o Hamutuk no Televizaun Edukasaun. Iha studio ita iha tiha ona bainaka espesiál, kandidatu PdR, número 8, Dr. Antonio da Conceição 'Kalohan'. Boa noite, kandidatu.

Kalohan: Boa noite.

Juvinal: Benvindu ba studio TVE. Ita sei iha segment tolu iha entrevista esklusívu ida ne'e. Segment ida sei ko'alía kona-ba ita boot nia vizaun rasik, segment segundu sei ko'alía kona-ba asuntu polítku, demokrasia, direitus umanus no seguransa, no segment ikus liu sei ko'alía kona-ba asuntu ekonómiku. Kandidatu, ita boot nia Prezidente Partidu horiseik dehan katak kandidatu Kalohan hanesan rekursu ida ne'ebé Partidu Demokrátiku oferece ba povu TL, hodi sai nudár PdR. Pergunta mak ne'e: saida maka loos ita-boot nia vizaun estratéjiku ida, ne'ebé ita boot sei ajuda Timor, ba tinan lima oin mai?

Kalohan: Obrigado ba TVE no ba La'o Hamutuk ba realiza debate ida ne'e. Hanesan sidadaun ida Timor-Leste, ha'u hanoin ema hot-hotu tenke responsabilidade ba NASAUN ne'e, no ha'u sente katak ha'u mós iha responsabilidade ba NASAUN ida ne'e atu kontribui ha'u nia pensamentu, ha'u nia hanoin, hodi bele realiza governasaun país ninian no atu bele konstrui NASAUN ninian. No tanba ida ne'e maka ha'u kandidata an ho intensaun polítkika ida, ho vizaun estratéjiku ida ne'ebé ha'u nia hanoin katak ita too ona tempu ida, atu ita harii Timor foun ida ba Timor oan hot-hotu. No ha'u hanoin katak ita nia rekursus ne'ebé mak eziste iha rai laran tenke sai benefísiu ida ba Timor oan tomak.

Juvinal: Oinsá bele konkretiza ita boot nia vizaun hodi utiliza rekursu Timor nian ba povu?

Kalohan: Ohin loron ita faze konstrusaun NASAUN no ita sai husi konflítu ida, entaun TL tenke sai espasu ida ba Timor oan hotu-hotu. Ita tenke promove unidade nasional entre ita Timor oan sira. Ne'e konseitu importante tebes tanba ita nia luta ba ukun rasik an lori tempu ne'ebé naruk, no mós iha vítima barak ne'ebé mak fó tiha ona sira nia an mate ba rai ida ne'e. Entaun ho konseitu ida ne'e ha'u atu dignifika Timor oan hotu-hotu, e au mezmu tempu atu fó rekoñesimentu no valorizaun ba ita nia herois sira, ita nia ema sira ne'ebé mak mate. Konviksaun polítkika ida ne'ebé mak fundadores NASAUN sira mehi ba Timor-Leste, katak independénsia ne'e buat ida ne'ebé maka la'ós abstratu, no buat ida ne'ebé maka realidade. Tanba ne'e ha'u hanoin se ita mehi ona hanesan ne'e, ita nia rekursus iha rai laran tenke kontribui ba ita nia dezenvolvimentu sosio-ekonomiku Timor-Leste ninian ne'ebé lori ben-estar ba ita Timor oan hotu.

Juvinal: Kandidatu, ita boot dehan katak, ha'u mak kandidatu di'ak liu kompara ho kandidatu seluk. Saida maka diferensa entre ita boot nia vizaun ne'e kompara ho vizaun husi kandidatu sira seluk?

Kalohan: Depois Partidu Demokrátku deside tenke aprezenta kandidatu ida, ami halo refleisaun ne'ebé mak kle'an. Ha'u hanoin katak ita sai husi konflítu naruk tebes, mai tan ona iha prosesu konstrui nasaun, no jerasaun foun tenke kontinua prosesu luta ne'e, la'ós ona luta kaer kilat, maibé luta pensamentu, luta estratéjia, no ha'u hanoin katak ha'u sai hanesan alternativa di'ak ida tanba ha'u hatene katak dezde 2002 mai too ohin loron, formatu governasaun ne'e seidauk iha mudansa. Ita tenke hakotu periodu ida para ita inisia prosesu foun, no tanba ida ne'e mak ha'u sente katak ha'u bele aprezenta alternativa ida ba populasaun, hanesan mós kandidatu sira seluk, karik sira di'ak liu ha'u, maibé ha'u tenke afirma katak ha'u kandidatu di'ak.

Juvinal: Ita ko'alia kona-ba kandidatu nia ideia alternativu, maibé alternativu la bele sees husi konstituisaun da repúblika. Husi knaar sira PdR nian, knaar ida ne'ebé sai prioridade boot ba kandidatu rasik?

Kalohan: Tuir ha'u nia refleisaun ba mandatu prezidensial nian, hahú husi Prezidente Xanana tau ninia prioridade, oinsá Timor-Leste sei hetan ninia estabilidade política, rekonsiliaсаun entre Timor oan sira, atu nune'e ita tenke husik ita nia pasadu, no ita tenke hateke ba oin. Depois ha'u mós observa katak Dr Ramos-Horta hanesan PdR mós fó alternativa ida hodi bele resolve konflítu ida ne'ebé mak ita hasoru iha 2006, no Prezidente rua hahalok tuir sira nia kontextu. Ha'u mós observa atuál PdR Taur Matan Ruak hanoin katak depois tinan sanulu independénsia, ita seidauk iha mudansa ba ita nia populasaun sira nia moris. Entaun Prezidente hahu ninia papél atu halo reprezentasaun ba povu nia lian.

Juvinal: Entaun partisipasaun povu mak ita boot nia prioridade - oinsá mak atu lori estadu besik liu povu?

Kalohan: Ha'u mós hanoin katak tanba PdR eleitu husi povu, tenke sai duni portavós no advogadu povu nian. Tanba ne'e ha'u tenke halo papél ida ne'e duni hanesan PdR hodi fó lian ba sira ne'ebé mak la iha lian, no ha'u bele hakilar mós bainhira presiza ha'u atu hakilar.

Juvinal: Iha media ko'alia sai katak kandidatu bainhira hanesan Ministru oferese bolsu estudu ba nia oan rasik. Ne'e ema konsidera hanesan pratika korrupsaun ka nepotizmu. Ita boot bele esplika, informasaun ne'e loos ka la loos?

Kalohan: Ha'u tenke fó ha'u nia esklaresimentu ba públiku tanba ida ne'e mós ba ha'u nia dignidade hanesan governante ida. Ha'u iha oan feto ida mak simu bolsa hosi governu Timor-Leste, maibé nia simu bolsu estudu ne'e bainhira ha'u sei iha hela Ministru Komérsiu. Ha'u nia oan remata ninia estudu husi eskola Sao José no komesa ninia estudu iha universidade nasional Timor-Lorosa'e. Eskola Sao Jose eskola ne'ebé mak di'ak, tanba nee ha'u konfia eskola oferese kualidade edukasaun no intelektual, no ha'u nia oan kompete no hetan bolsu estudu.

No kona-ba akuzasaun sira seluk ne'ebé dehan katak ha'u fó tan bolsu estudu ba ha'u nia oan rua, ida estuda iha Portugal no ida tan iha Filipina. Ida ne'e akuzasaun ida ne'ebé mak la loos, no mosu iha tempu mak ha'u kandidata an ba PdR, no ida ne'e hanesan asasinasaun ba ha'u nia an atu ha'u la bele hamriik hanesan Prezidente. Ha'u nia oan ida Fidalgo, governu Portugal mak oferese doze bolsus ba sira ne'ebé mak ba lisensiatura (Bachelor). Nia hatama nia aplikasaun bainhira ha'u iha misaun iha Mozambique, no ha'u fila husi Mozambique ha'u tránzitu iha Portugal, ha'u nia oan mós ba ho estudante sira seluk, no ha'u hasoru nia iha ne'ebá.

Juvinal: Ita boot konsidera katak prosesu nia hetan bolsu estudu hanesan prosesu normal?

Kalohan: Prosesu normal ida ne'ebé mak oferta no ha'u nia oan, sim aman mak Ministru maibé nia sidadaun Timor ida, nia iha direitu hanesan labarik sira seluk atu bele aproveita oportunidade mak iha. Favoritizmu ha'u la hare husi ida nee tanba la'ós ha'u mak fó, ne Governu TL mak fó.

Juvinal: Nudár aman, saida mak ita boot sente bainhira iha akuzasaun sira hanesan nee?

Kalohan: Ha'u sente triste ba situasaun sira hanesan nee bainhira ha'u haree iha membru governu barak, iha deputadus barak, se situasaun ida ne'e monu ba governante seluk iha possibilidade atu ema atu hamosu situasaun hanesan nee, ka lae? Ka ema nonook ba situasaun hanesan nee, maibé halo ba ha'u tarde tanba ha'u kandidatu an ba Prezidente. Ida ne hanesan impedimentu político ne'ebé mak maluk sira hakarak halo hodi trava ha'u nia an, maibé ha'u hakarak oferese ha'u nia an ba nasaun. Maibé akuzasaun halo diskriminasaun ida ba sidadaun Timor oan sira, ema sira ne'ebé mak governantes eskluido, hodi dehan katak labarik sira ne'ebé maka aman Ministru ka aman ou inan Parlamentu ou deputadu sira la hetan direitu hanesan mós sidadaun baibain.

Juvinal: Konstituisaun de república hatuur ona prinsipi separasaun podér. Karik ita boot eleitu, oinsá ita boot bele halo garantia kona-ba check and balance ho órgaun estadu sira seluk?

Kalohan: Ita tenke fó valorizasaun ba ita nia konstituisaun ba república, bainhira ita hakarak hili sistema ho prinsipi separasaun podér husi orgauns de estadu nian. No ida ne'e lori ita ba pergunta saida maka boa governasaun? Bainhira ita haketak ona funsaun PdR, governu, Parlamentu nacionál no órgaun judisiariu, órgaun sira bele sente sira nia responsabilidade rasik atu bele hala'o servisus di'ak ba ita nia populasaun. Maibé separasaun podér la signifika independénsia total órgaun ida ne'ebé mak estadu nian. Tenke iha diálogu konstante entre instituisaun sira ne tanba objetivu komún mak atu serve povu.

Juvinal: Iha prosesu Orsamentu Jerál Estadu nian, governu mak prepara orsamentu, Parlamentu mak aprova orsamentu, no Prezidente nia funsaun mak atu promulga ka veta orsamentu. Iha tinan 2016, PdR atuál TMR veta OJE, no Parlamentu la halo tuir saida mak nia sujere no vota kontra nia voto. Saida mak ita boot sente hanesan valor kompeténsia Prezidente nian ba voto ka promulga?

Juvinal: Iha futuru se ita boot veta diploma ruma husi governu, meius komunikasaun saida mak kandidatu rasik sei foti atu bele komunika ho Parlamentu nacionál ou governu?

Kalohan: Ita tenke estabelese mekanizmu ba ida ne'e, tanba Prezidente hanesan ema ida labele hare problema hot-hotu ne'ebé mak iha. Ida ne bele halo komunikasaun efetivu atu transmite pensamentu hodi bele ajuda governu atu hanoin fila fali. Entaun ho nia baze ida ne, ho mós analise téknika ne'ebé mak hola husi esperiénsia tinan fiskál anterior bele sai hanesan referénsia atu fó pensamentu atu bele hadi'ak orsamentu.

Juvinal: Konstituisaun RDTL rasik hateten katak PdR maka xefe estadu, símbolu no garante independénsia nacionál, no unidade estadu nian, instituisaun demokrátiku no funzionamento regular. Tanba ita boot mós hanesan sekretáriu jerál ba PD, se karik ita boot nia partidu maka manán iha eleisaun Parlamentár ou ka membru koalisaun governasaun, Saida mak ita boot sei halo atu bele garante independénsia no atu ajuda katak desizaun PdR nian la iha conflict of interest ka alinha liu ba PD nia interese?

Kalohan: Se uma símbolu de unidade nasionál nia tenke haketak ninia grupu ho interesse nasionál nian.

Juvinal: Signifika katak ita boot sei rezigna hanesan sekretáriu jerál partidu?

Kalohan: Se povu hili ha'u nudár Prezidente ha'u tenke husik ha'u nia funsaun hanesan Sekretáriu Jerál Partidu, atu ha'u bele konsentra ha'u nia responsabilidade ba povu Timor-Leste. Ha'u defende prinsipiu ida ne'ebé mak hanesan mós matebian La Sama ko'alía - ha'u nia dignidade la as liu dignidade nasaun ninian.

Juvinal: PdR tuir konstituisaun nudár xefe ba estadu ida ne'ebé demokrátiku e soberanu. Agora daudau, Timor-Leste rasik seidauk iha liña fronteira ida ne'ebé permanente, no seidauk iha rain terrestre, lalehan no tasi mos. Timor-Leste lori kazu kontra Australia tanba seidauk iha fronteira marítima ne'ebé permanente, no agora daudau mós iha negosiasiun ho Indonézia. Nudár PdR, saida mak ita boot sei halo atu bele garante katak Timor-Leste bele iha soberania ne'ebé metin liu, no la bele lakon rai pedasuk ida ka tasi pedasuk ida ba nasaun seluk?

Kalohan: Ha'u hanoin ita Timor-Leste terus iha tinan naruk, no ita halo funu tanba ita hakarak atu haree Timor-Leste nia soberania total. Ita nia fronteira marítima define ba integridade no soberania TL ninian. Tanba ida ne nudár PdR, política internasional no mós iha responsabilidade de política nia ezersia nia papél, kopu diplomata mós atu bele kontribui ba rezolusaun de problema...

Juvinal: Ita boot sei hamriik iha liña terdepan (front) ba luta povu nian ba fronteira marítima?

Kalohan: Husi governu nia diplomacia, PdR mós tenke halo papél ida ne hodi bele defende soberania TL nian no fronteira marítima. Ita labele tau responsabilidade ida grupu ida ou partidu ida ka governu ida. Tenke sai continuidade husi governu ida be governu seluk. Ate ita hetan solusaun definitivu katak fronteira marítima rezolve ona, ita nian mak ita nian no sira nian mak sira nian. Ida ne la tau en kestaun ita nia relasaun di'ak ho Australia, maibé ita husu de'it ita nia direitu. Ha'u hanoin iha mós responsabilidade Australia atu bele fó buat ne'ebé mak Timor ninian.

Juvinal: Se iha ita boot nia kampaña atu ba iha futuru nian, ita boot prontu atu husu nafatin responsabilidade Australia atu respeita soberania?

Kalohan: Hanesan mós uluk kuandu ita halo funu ida ne, ita husu ba Australia atu respeita direitu Timor ninian, ita husu ba Indonézia atu respeita direitu Timor nian. Ita husu ba komunidade internasional atu husu direitu Timor nian, ida ne kauza nasional ne'ebé PdR tenke nafatin atu halo hodi nune'e bele finaliza ita nia independénsia total.

Juvinal: Relatório Chega! fó rekomentasaun lubuk ida, katak estadu TL ka Indonesia ka komunidade internasional presiza atu estabelese mekanizmu sira atu responde ba krime kontra umanidade ne'ebé mak akontese durante okupasaun Indonézia. Too ohin loron la iha mekanizmu formal, no PdR sira la ko'alía kona-ba asuntu justisa, governante sira mós la ko'alía. Nudár PdR iha futuru ita boot prontu atu mós reprezenta povu nia interesse hodi lori akuntabilidade ka lori justisa ba vítima sira ne'ebé hetan sofrementu durante okupasaun Indonézia?

Kalohan: Ha'u hanoin ita tenke rekoñese katak konsekuénsia funu ninian lori duni vitimas no hahalok ne'ebé mak brutal ne'ebé komete ba ita nia populasaun sira. Maibé mós ita tenke hanoin kontextu ida ne ita ho Indonesia, no ita bele husu responsabilidade ne ba Indonesia ho forma sira ne'ebé mak bele konstrui ita nia relasaun di'ak ho Indonesia. Maibé ita la bele responde de'it tanba ejijénsia ema seluk, entaun se ema seluk mak husu ita atu halo kondenasau ida ne, ha'u hanoin mós ema seluk tenke assume ninia responsabilidade ba hahalok sira ne'ebé maka sira fó, sira nia apoiu ba Indonesia mós oho ita nia ema. Entaun la'ós kestaun ida ne'ebé ita Timor ho Indonesia de'it tenke halo julgamentu ba sira ne'ebé mak komete ona krime kontra umanidade iha TL, maibé mós implika sira hotu ne'ebé mak fó sira nia apoiu ba Indonesia.

Juvinal: Klaru katak Chegal! fó rekomendasau formal ida ofisiál ne'ebé mai husi TL rasik. So, hanesan PdR ita boot prontu atu lori ida ne?

Kalohan: Ita tenke diálogu ho Indonesia hodi haree formas ne'ebé maka appropriadu atu ita bele halo fó solusaun ba problema ida ne, no Indonesia rasik bele haree ninia problema. Imposivel ba TL atu julga sira halo estradisaun atu lori mai. Se ita seidauk iha akordu de estradisaun ruma ne'ebé mak ita halo ho Indonesia ida ne la realistik. Maibé, asaun ne sira bele alerta mundu tomak kona-ba hahalok sira ne'ebé mak la di'ak, no Indonesia rasik maka tenke iha hanoin ida atu fó justisa ba Timor, hodi halo saida mak nia tenke halo ba ninia ema sira ne'ebé mak komete krime, no deside kastigus ne'ebé mak sira sei fó, naun nesesáriamente kastigus ne'ebé maka tenke lori ninia ema hatama ba kadeia.

Juvinal: Entaun iha meius konkretu ida ne'ebé karik hanesan Prezidente hanoin atu ajuda povu ne hodi labele moris iha injustisa tan?

Kalohan: Ha'u hanoin ita presiza atu promove diálogu no ita nia ema sira ne'ebé mak sai vitimas, ema sira ne'ebé lakon tiha, tenke iha reparasaun.

Juvinal: Tuir prezidensia, se mak bele fó reparasaun: autór krime ka estadu Timor-Leste agora?

Kalohan: Estadu ne'ebé mak komete krime iha responsabilidade moral ida atu halo reparasaun.

Juvinal: Atu garante estabilidade nasional no hametin liután instituisaun forsa defeza, nudár komandante supremo F-FDTL, saida mak ita boot sei hanoin atu bele ajuda F-FDTL sai hanesan instituisaun seguransa mais profesional iha futuru?

Kalohan: Kuandu ita ko'alia kona-ba profisionalizmu, kompeténsia instituisaun ita liga ba rekursus umanus ne'ebé mak iha. No ita tenke haree rekursu umanus ba lideransa. Só iha de'it lideransa ne'ebé mak di'ak, depois bele fó ninia lideransa ne'ebé bele refleita ba instituisaun rasik. Tenke identifika personalidade ne'ebé maka dignu atu halo reprezentasaun ba instituisaun ne, no ita tenke hanoin tan méritu ne rasik, ninia lealdade, ninia nasionalizmu, ninia patriotizmu. Nune'e ita bele hili lider ida ne'ebé másimu atu lidera forsasa armadas iha TL.

Ita mós tenke valoriza instituisaun ida ne dezempeña. Bainhira ita la valoriza ninia hahalok, maibé ita minimiza kapasidade instituisaun, ida ne la hakbiit instituisaun rasik.

Juvinal: Povu barak preokupa hela kona-ba atitude forças seguransa militár ho polísia ne'ebé dala barak viola ou komete krime sira ne'ebé povu konsidera hanesan violasaun sira nia direitus

umanus. Nudár komandante supremu, ita boot konkorda atu bele iha formasaun kona-ba direitus umanus iha F-FDTL ka polísia rasik?

Kalohan: Ha'u hanoin formasaun nee nesesáriu ba instituisaun, kualkér instituisaun maibé liuliu ba F-FDTL ho PNTL. Tanba nee nia tenke karakteriza nia an didi'ak ho respeita ba direitus umanus, haketak saida mak direitus umanus ne atu la bele viola ema nia direitu, maibé ezersia nia papél ida ne'ebé mak atu fó defeza, atu fó seguransa ba NASAUN, ba povu ne rasik. So, ita halo diferensa ida ne, ita valoriza instituisaun ida ne, no instituisaun rasik bele konsiente ba ninia responsabilidade, no bele respeita ba direitus umanus povu ninian atu nune'e la bele halo violasaun sira ne'ebé la nesesáriu.

Juvinal: Durante nee, ita boot haree F-FDTL promove direitus umanus durante sira nia asaun?

Kalohan: Sira nia partisipasaun iha eventu hanesan forças internacionais ne meius ida mós atu dezenvolve sira nia kapasidade, haree esperiênsia NASAUN seluk ninian, oinsá sira sei mak kria relasaun entre forças armadas ho populauna, no ha'u haree sira hahú dezenvolve an. Maibé kona-ba komportamentu, ita tenke haree fatór sira seluk ne'ebé lori nia hodi bele komete hahalok ruma, hanesan problema pesoál, tanba ne ha'u hanoin sira bele komete, maibé la'ós tanba nia forsa, maibé tanba nia situasaun individu.

Juvinal: Iha 2015, iha operasaun militár iha Laga, Baucau ne'ebé envolve militár ho polísia, ita hatene ikus liu rezulta ema mate, Mauk Moruk ho ninia elementus. Sosiedade sivíl, ativista direitus umanus barak konsidera katak ida nee mak 'extra-judicial killing', ne'ebé konstituisaun RDTL rasik la fó dalan. Nudár PdR iha futuru hanesan jerasaun foun, sá política ita boot sei foti atu bele garante hahalok ne'ebé mai husi mekanizmu extra-judisiariu la bele akontese tan iha TL?

Kalohan: Ha'u hanoin prinsipi diálogu mak meiu ida ne'ebé mak bele rezolve ita nia problema, maibé ita mós presiza harii estabilidade iha ita nia rai laran. Ita mós labele hakru'uk ba komportamentu individual ne'ebé afeita ba interesse nasional. Iha situasaun sira ne tenke uza meius persuasivas, la'ós meius represivas, signifika katak ita tenke halo approximasaun, ita tenke loke diálogu. Se ho problema internacionál, ita tuur iha meza atu resolve, tanba sá maka entre Timor ho Timor la bele tuur iha meza atu resolve? Tanba nee, karik iha approximasaun sira ne maka iha kestaun de tempu, no ita hakarak atu problema sira bele resolve lais liu, en vez de ita mós fó tempu uitoan atu haree didi'ak ita nia problema sira oinsá mak atu resolve.

Juvinal: Ita hatene katak kazus operasaun militár nee la'ós mai husi komandante FDTL, maibé husi rezolusaun ne'ebé deside husi Parlamentu Nasional. Ita boot iha ne'ebá hanesan Prezidente Komisaun Partidu Demokrátku, no PD rasik mós envolve iha foti rezolusaun ida nee. Durante foti rezolusaun ida ne Parlamentu Nasional rasik, nudár Prezidente Komisaun nasional, ita boot konkorda ka deskonkorda ho rezolusaun ida nee?

Kalohan: Ha'u ladún envolve diretamente iha prosesu ida hola desizaun, maibé ha'u sente katak situasaun nee dilematiku, kilat ho kilat. Iha kilat ho kilat, ita la hatene oinsá atu rezolve ida ne ho loos. No desizaun mai tanba kilat hasoru kilat, no ida ne karik ita ba bíblia, iha approximasaun matan hasoru matan, nehan hasoru nehan.

Juvinal: Entaun signifika katak ita boot konkorda ba rezolusaun ne'ebé mai husi Parlamentu rasik?

Kalohan: Ha'u la dehan ha'u konkorda, maibé ha'u dehan katak karik meius ida ne'ebé mak Parlamentu uza atu rezolve problema. Agora, persegisaun ne buat ketak ida ne'ebé autoriza forças armadas atu halo operasaun, tanba estadu preokupa ba estabilidade política nasaun ninian. Efeitu ne la'ós ba ema ida, maibé efeitu ne ba nasaun. Tanba nee iha tempu ne'ebá ema hot-hotu deside, no prosesu ida para atu provoka diálogu ne. Maibé mós karik la iha meius ida ne'ebé mak kondisiona atu diálogo ne bele akontese, no tanba ida ne maka karik akontese buat ne'ebé ita hotu mak la espera. Maibé ha'u defende prinsipiu de diálogo.

Juvinal: Tanba hanesan Prezidente komisaun política nacionál, maibé ita boot mós hanesan Ministru Edukasaun, operasaun ida ne fó trauma psikolojia ba labarik no estudante sira. Tempu ne'ebá, saida mak ita boot halo atu ajuda joven sira, labarik sira, estudante sira hodi labele iha trauma psikolojia ida nee?

Kalohan: Ha'u hanoin ita agora iha situasaun ida ne'ebé rekupera, la'ós de'it ba labarik sira ne'ebé maka traumatizada tanba operasaun, maibé mós populaun jerál atu haree fila fali ba prezensa forsa ninian rasik. Oinsá mak ita bele dezenvolve konfiansa ida nee? Governu tenke halo política ruma atu fó fila fali konfiansa ida ne ba povu ba nia forças armadas no ba ninia governu rasik, atu dignifika ita nia povu maibé mós estadu nafatin hetan ninia respeitu ba buat ne'ebé mak nia halo. No ha'u hanoin la'ós buat ida ne'ebé mak ita tenke halo de'it agora maibé buat ida ne'ebé mak atu kontinua, tanba kooperasaun ne mós lori ona konsekuénsia seluk. Bele mós iha uma ne'ebé destruidos, populaun ne'ebé mak demobilizados. Entaun ita presiza assisténsia humanitaria ka servisu sira seluk ne'ebé mak bele manán fila fali, no tenke halo edukasaun siviku, atu ita nia populaun sira comprende saida mak sira nia direitu, maibé mós tenke hatene saida mak sira nia obrigasaun.

Juvinal: Molok ita pasa atu ba asuntu ekonómiku, ha'u hakarak atu fó oportunidade ba maluk sira iha studio se karik iha pergunta ruma atu husu relasiona ho asuntu político ou direitus umanus.

Celestino: Ha'u hakarak hato'o ha'u nia pergunta kona-ba kompeténsia PdR nian ne'ebé bele deklara inkonstituisionalidade ba rezolusaun sira hotu ne'ebé Parlamentu ka Governu mak halo. Ita boot hanoin katak iha futuru se iha rezolusaun ida ne'ebé kontradiktoriu ho ita nia konstituisaun hanesan moderador Juvinal ohin hatete, liu-liu liga ho operasaun militár no seguransa, ita boot sei deklara ida ne ka lae?

Kalohan: Prezidente nia direitu, ninia kompeténsia mak atu promulga lei sira. Ha'u hanoin PdR iha kompeténsia atu estuda lei nee, halo analiza ba lei nee, la'ós de'it ba konteúdu lei, maibé ninia implikasaun lei nian rasik ba sosial ninian, se lei ne fó afeita pozitivu ka negativu ba moris populaun. Se lei ida nee nia implikasaun la di'ak ba povu, ha'u hanoin lei ida nee mak presiza atu reeve. Porezemplu ita bele ko'alía de'it kona-ba Lei Rai ninian. Se Lei Rai atu hasai populaun, no estadu mak iha direitu ba sasán hotu, estadu ne mak se? Estadu ne órgaun abstratu ida, ka estadu ne halo reprezentasaun ba povu?

Juvinal: Signifika katak Lei Rai agora, ita boot haree katak nia seidauk di'ak ba povu TL?

Kalohan: Ha'u hanoin ita tenke haree se lei fó duni benefísiu ba povu. Bainhira ita dehan rai ida nee estadu nian, no estadu hakarak atu foti, estadu tenke kria kondisaun ba nia povu. Ita la bele duni sai ita nia povu, hodi ba tau fila fali iha estrada ninin, no en vez de konstrui povu nia moris,

estraga tan ninia povu. Portantu, tenke iha ekipa di'ak atu haree impaktu lei nian rasik, antes ita halo promulgasaun.

Juvinal: Timor-Leste agora nia ekonomia depende ba reseitas mina-rai. Nudár Prezidente, saida mak ita boot nia vizaun atu bele ajuda estadu Timor-Leste para iha dezenvolvimentu ekonómiku ne'ebé sustentável liu, atu bele troka ekonomia petrolifeira?

Kalohan: Ita iha ona Planu Estratéjiku ne'ebé ita iha mehi TL bele sai NASAUN rendimento médiu-alto iha 2030. Se ita iha vizaun ida ne tiha ona, ita presiza mak atu halo asaun saida maka nesesáriu para atu bele atinje ida ne. Ita tenke iha kampu de traballo, indústria, rekursu umanus ne'ebé mak kompetentes. Ita nia orsamentu mós tenke investe iha setór produtivus, atu lori reseitas mai estadu. Mina-rai la'ós úniku fonte ne'ebé mak ita iha, ita sei iha rekursus ne'ebé ita seidauk book. Turizmu nee rasik, area ida ne'ebé maka produtivu, maibé presiza investimentu.

Juvinal: Entaun ita konkorda katak presiza dezenvolve setór agrikultura, indústria no turizmu. Maibé ita hatene katak Prezidente nia knaar atu veta ka promulga orsamentu. Ita hatene katak durante tinan 10 ikus nee, investimento ba setór agrikultura menus husi 2% OJE tinan-tinan. Ita mós la iha política kona-ba dezenvolvimentu indústria ki'ik, atu loke kampu de traballu. Se karik iha Orsamentu ne'ebé mak nafatin la fó atensaun ba setór hirak nee, sá desizaun ita boot sei foti?

Kalohan: Ha'u nia prioridade iha dezenvolvimentu ekonomia mak dezenvolvimentu ba rekursus umanus ka edukasaun. Atu hadi'ak kualidade moris ita mós presiza dezenvolve agrikultura no nutrisaun. Maibé ha'u hanoin servisus do komérsiu mós importante tebes, atu dezenvolve industrias no kria kampu traballo, no mós atu jere reseita ba estadu.

Juvinal: Nudár eis-Ministru Komérsiu no Indústria, sá política mak ita boot konsegue dezena ka implementa atu ajuda dezenvolvimentu indústria ki'ik iha rai laran?

Kalohan: Ha'u bele dehan katak ha'u promove duni baze ekonomia nian liu husi programa dezenvolvimentu industrias kazeiras (indústria iha uma), iha barak tebes hala'o hela iha Timor, hanesan virgin oil, tais, masin no prosesamentu ai-han seluk. Maibé ita seidauk iha meius atu hatama produtu lokál iha merkadu nasionál ninian, hodi bele redús importasaun. Ita seidauk iha política ida no governu mesak labele halo, tenke iha partisipasaun ativu husi setór privadu nasionál. Maibé buat ida ne'ebé mak akontese mak ita hot-hotu iha depende de'it projetu governu nian, ita hein sira hasai osan ba ita, la'ós ita mak tau osan atu kria kampu traballu iha rai laran.

Juvinal: Bayu-Undan, úniku kampu mina-rai ne'ebé mak agora ita iha, atu maran iha tinan hat-lima oin mai. Tanba ita boot bele sai Prezidente iha periodu ikus Bayu-Undan nian, ita boot sente katak ne perigozu ba TL ka lae?

Kalohan: Sertamente, ita depende de'it setór petrolíferu, no reseitas mós mai husi BU no ida nee maran, nee sertamente ke iha impaktu. Iha impaktu ba ita nia kreximentu ekonómiku NASAUN ninian, iha impaktu mós ba ita nia reseitas.

Juvinal: Entaun, saida mak ita boot sei sujere ba governu ou Parlamentu atu bele toma atensaun ba situsauna ida nee?

Kalohan: Governu tenke haree oinsá bele dezenvolve area seluk para kontribui reseitas ba ita nia rain. Maibé ita hodi dehan katak tanba mina rai atu maran mós mak ita atu la hasai osan atu halo dezenvolvimentu. Ida nee mós ita kumprimente ita jerasaun ita agora daudauk maka sei iha responsabilidade atu hala'o dezenvolvimentu hodi kria kondisaun ba jerasaun futuru ninian ida nee situasaun ida ne'ebé mak ha'u hanoin governu tenke ser haree didi'ak atu nia hola medidas pontuais atu bele iha fila fali meius ida para atu bele nafatin fó reseitas ba NASAUN. Mais sertamente ke ita tenke ser mós iha konviksaun ida dehan katak NASAUN nenee, sei uluk sein osan, NASAUN sei la'o hela. Ita nia povu terus hela, mais ita mós la'o hela. Mais ohin loron ita sukat buat hotu ho osan ona.

Juvinal: Iha Timor agora, 67% povu sira la tama iha ekonomia formal, no sira moris husi ekonomia kreativu rasik. Porezemplu sira halo tiga roda hodi ba fa'an iha estrada. Maibé infelizmente estadu utiliza Dekretu-Lei ida kona-ba eijin no orden públiku hodi bandu no hadau sasán komunidade nian. Karik sai eleitu hanesan PdR, ita boot prontu atu revee fila fali Dekretu-Lei ida nee?

Kalohan: Dekretu-Lei nenee mai husi Governu. Portantu se Governu maka prepara dekretu-lei nia bele revoka lei nee.

Juvinal: Ita boot bele sujere?

Kalohan: Nia bele revoka lei nee rasik bainhira nia fó konsekuénsia negativa ba moris povu ninian. Ha'u hanoin katak ita iha duni responsabilidade ida atu bele hadi'a ita nia sidade. Maibé mós, ida ne la signifika ita sei kumprimete ita nia povu nia moris. Tenke kria kondisaun ida ne'ebé maka di'ak atu nia ema sira bele buka vida. Maibé mós vendedor abulante sira buka ema sira atu sosa sira nia sasán, no forma negósiu ida ne maka simples tanba skill ne'ebé mak sira iha seidauk too atu bele halo buat ida mais atrativu. Portantu, ha'u sente katak tenke proteje populasaun, maibé mós ha'u hanoin katak sidadaun tenke hola responsabilidade ba NASAUN ninian. Tenke buka moris, maibé se iha estrada publika ne signifika impedimentu tráfiku.

Juvinal: Parlamentu aprova Lei Mineiru ne'ebé foti povu nia rai. Timor ki'ik hela, no mineiru sempre fó impaktu ambientál, fo'er ka tóksiku. La'o Hamutuk rasik no ativista sira sempre hanoin katak di'ak liu ita la iha atividade mineiru. Nudár PdR, ita boot konkorda atu lei mineiru nee iha ou presiza revee ka ou la presiza atu iha?

Kalohan: Dezenvolvimentu mineiru ita nesesita, se ita hakarak atu iha mós fontes de reseitas ba ita nia rain. Ita presiza atu antisipa impaktu ambientál no oinsá prevene no rekupera impaktu ambientál. Lei tenke prevee ida nee no tenke fó responsabilidade ida nee ba indústria sira, ita bolu dehan corporate social responsibility, responsabilidade sosiál husi empreza sira. Se ida nee iha Lei ha'u hanoin ita presiza tanba dezenvolvimentu indústria ba NASAUN atu kria emprega nee nesesáriu e mós atu prodús reseitas ba ita nia NASAUN.

Juvinal: Agora daudaun iha mensajen barak mai husi telespektadores sira iha uma. Karik ita boot bele ko'alia buat ruma ba sira?

Kalohan: Ha'u hanoin ita hot-hotu presiza atu bele dialoga nafatin atu bele kria kondisoens atu dezenvolve no konstrui NASAUN, la'ós de'it ema ida atu ko'alia espresa ninia hanoin, maibé karik iha tan diálogu ne'ebé maka interativu entre populasaun ho kandidatu sira. Ne ha'u hanoin kontribui ba ita nia dezenvolvimentu nasional, no mós kontribui ba prosesu demokrátiku ne'ebé

maka ita atu hala'o iha 20 Marsu. Ha'u hanoin populasaun bele fó Pensamentu atu bele ajuda PdR atu hanoin ona sira nia vizaun estratéjiku atu sira bele hare kuandu sira asume responsabilidade nee, sira hodi halo duni reprezentasaun ba populasaun.

Juvinal: Telespektador ida, liu husi SMS, hakarak husu ita: nudár PdR, saida maka kandidatu sei foti desizaun kuandu estadu hasoru problema difisil?

Kalohan: Agora ita la'o hela iha faze de konstrusaun NASAUN no konstrusaun estadu. Ita tenke hametin ita ninia instituisaun sira atu sira bele iha kapasidade atu bele hala'o sira nia knar tuir konstituisaun. Governu, setór judisiariu, Parlamentu tenke kompetente atu hala'o sira nia knar. Parlamentu la bele tuur de'it hodi halo reprezentasaun partidáriu, maibé tenke reprezenta povu no haree desizaun política sira nia afeitu pozitivu ka lae ba povu nia moris. Portantu iha situasaun sira hanesan ne difisil, no PdR bele sai ponte hodi bele kria komunikasaun, provoka diálogu, entre instituisaun sira hotu atu bele rezolve problema NASAUN ninian.

Juvinal: Timor-Leste iha tinan hirak kotuk nee, sempre foti osan barak husi Fundu Mina-rai liu RSE, nivel ne'ebé deside hodi asegura atu Fundu la bele hotu lalais. Parlamentu Nasional sempre aprova política ne'ebé fó dalan ba governu atu foti liu RSE. Se política ida nee kontinua, sei halo mamuk Fundu Petrolíferu nee lalais. Nudár PdR, saida mak ita boot bele halo atu ajuda katak governu nia política la bele halo mamuk lalais riku soin úniku ne'ebé mak ita iha agora.

Kalohan: Ha'u hanoin PdR bele promove komunikasaun entre governu, espesialmente haree ba prioridade dezenvolvimentu. Ita presiza atu halo konsentrasaun nune'e atu rekursus tenke iha benefisiu, para investimentu tenke iha retornu. Maibé too agora, investimentu ne'ebé mak ita halo seidauk bele dehan katak bele jere reseitas ka fó retornu immediatu ba ita nia rai.

Juvinal: Pergunta ikus relasiona ho governu nia alokasaun ba Zone Espesiál ho Tasi Mane. Too ohin loron, estudu ekonómiku sira la publika, no ita la hatene se projetu sei fó retornu ba TL. Nudár PdR, ita boot bele fasilita públiku atu hetan informasaun sira kona-ba projetu hirak nee ka lae? Nomos, se karik projetu fakar de'it osan, ita boot hanoin katak ida nee kontinua ka presiza halo revizaun?

Kalohan: Ita presiza atu divulga informasaun ne'ebé mak eziste tiha ona. Iha estudus ne'ebé mak halo ona ba iha kosta sul ninian, liu liu ba iha Suai, ba Manufahi, no mós ba iha Viqueque ba Betano. Iha estudu ne'ebé maka klasifika Zonas Dezenvolvimentus, Zonas Habitasaun e Zonas Agrikultura. Ita tenke interpreta planu no estudu hodi haree ba termus implementasaun ninian. Ha'u labele dehan katak dezenvolvimentu nee la'ós prioridade, tanba husi parte ida ita presiza atu hala'o dezenvolvimentu, maibé husi parte ida ita iha limitasaun ba rekursu finanseiru.